

1305.

Na osnovu člana 30 stav 4 Zakona o ugovoru o prevozu putnika morem („Službeni list CG“, broj 2/26), Ministarstvo pomorstva donijelo je

P R A V I L N I K O OBLIKU, SADRŽAJU I NAČINU IZDAVANJA SERTIFIKATA O OSIGURANJU OD ODGOVORNOSTI PREVOZNIKA U PREVOZU PUTNIKA MOREM

Član 1

Ovim pravilnikom propisuje se oblik, sadržaj i način izdavanja sertifikata o osiguranju ili drugom finansijskom jemstvu od odgovornosti prevoznika za smrt ili tjelesnu povredu putnika, sadržaj isprave o jemstvu koja pokriva ili ne pokriva ratne rizike, a koju izdaje osiguravač (Blue Card), kao i klauzule o isključenju pokrića za radioaktivno zagađenje, hemijsko, biološko i elektromagnetno oružje, isključenju pokrića za kibernetički napad i klauzule o prestanku pokrića osiguravača i izuzeću u slučaju rata.

Član 2

Sertifikat o osiguranju ili drugom finansijskom jemstvu od odgovornosti prevoznika za smrt ili tjelesnu povredu putnika (u daljem tekstu: sertifikat) sadrži sljedeće podatke:

- 1) ime broda, pozivni znak i luku upisa;
 - 2) ime i glavno poslovno sjedište prevoznika koji stvarno obavlja prevoz u cjelini ili djelimično;
 - 3) IMO broj za identifikaciju broda;
 - 4) vrstu i trajanje, odnosno datum početka važenja osiguranja ili drugog finansijskog jemstva;
 - 5) naziv i glavno poslovno sjedište osiguravača ili drugog lica koje pruža finansijsko jemstvo, kao i poslovno sjedište osiguravača gdje je zaključeno osiguranje ili drugo finansijsko jemstvo;
 - 6) rok važenja sertifikata;
 - 7) sva dopuštena ograničenja, uslove i izuzeća osiguravajućeg pokrića.
- Sertifikat se izdaje na crnogorskom i engleskom jeziku.
Sertifikat se sačinjava na Obrascu 1.

Član 3

Ako ukupno pokriće osiguranih rizika prevoznika potiče iz više vrsta osiguranja, u sertifikatu se navodi osigurana suma iz svake pojedine vrste osiguranja.

Ako je osiguranje predviđeno za nekoliko vrsta osiguranja, u sertifikatu se navode sve vrste osiguranja.

Član 4

Osiguranje ili drugo finansijsko jemstvo od odgovornosti prevoznika treba da bude u skladu sa institutskim klauzulama iz člana 5 stav 1 tač. 1 i 2 ovog pravilnika, kao i klauzulama iz člana 6 stav 1 ovog pravilnika, koji su dati u Prilogu 1.

Član 5

Sertifikat se izdaje prevozniku koji posjeduje osiguranje odgovornosti od ratnih rizika i na osiguranje koje nije povezano sa ratom, čije pokriće je pribavljeno od različitih osiguravača i koja su izdata na osnovu sljedećih klauzula ili sa njima izjednačenim uslovima:

- 1) institutska klauzula o isključenju odgovornosti za radioaktivno zagađenje, hemijsko, biološko, biohemijsko i elektromagnetsko oružje (klauzula broj 370);

2) institutska klauzula o isključenju odgovornosti za kibernetički napad (klauzula broj 380);

3) isključenja i izuzeća pružaoca obaveznog finansijskog jemstva odgovornosti prevoznika u skladu sa zakonom, posebno pokriće ograničenja od 250 000 specijalnih prava vučenja (SDR) po putniku za svaki pojedinačni slučaj;

4) pokriće od odgovornost prevoznika za štetu u skladu sa zakonom kojim se uređuje ugovor o prevozu putnika, prtljaga i vozila morem;

5) uslov da svi iznosi ograničenja odgovornosti utvrđeni zakonom služe za smanjenje nepodmirene obaveze prevoznika i/ili njegovog osiguravača u skladu sa zakonom kojim se uređuje obavezno osiguranje odgovornosti prevoznika, čak i ako osiguravač nije isplatio naknadu štete za ratne rizike ili za druge rizike koji nijesu povezani sa ratom.

Osiguranje ratnih rizika treba da pruža pokriće odgovornosti, ako postoji, za štetu koja je nastala usljed smrti ili tjelesne povrede putnika uzrokovane sljedećim uzrocima:

1) rat, građanski rat, revolucija, pobuna, ustanak ili građanski sukob koji iz toga proizlaze, ili bilo koji neprijateljski čin od strane ili protiv zaraćene sile;

2) zarobljavanja, hapšenja, zaustavljanja ili pritvaranja, kao i posljedice toga ili pokušaja toga;

3) zaostalim minama, torpedima, bombama ili drugim napuštenim vrstama ratnog oružja;

4) činom terorista ili drugog lica koje djeluje zlonamjerno ili iz političkog motiva i svakom radnjom preduzetom za sprečavanje ili suzbijanje takvog čina;

5) konfiskacijom i eksproprijacijom.

Član 6

Osiguranje rizika iz člana 5 ovog pravilnika može da bude sklopljeno uz sljedeća izuzeća, ograničenja i uslove:

1) klauzula o automatskom otkazivanju i isključenju odgovornosti za rizik rata;

2) klauzula o roku od 30 dana za obavještenje o otkazivanju osiguranja u slučajevima u kojima ne dolazi do automatskog otkazivanja i isključenja odgovornosti za rizik rata iz tačke 1 ovog stava.

Član 7

Osiguranje rizika koji nijesu povezani sa ratom treba da pruži pokriće od odgovornosti za sve rizike za koje postoji zakonska obaveza osiguranja, osim rizika iz člana 5 ovog pravilnika, bez obzira na to primjenjuju li se njih izuzeća, ograničenja i uslovi iz člana 6 ovog pravilnika.

Sadržaj institutskih klauzula iz člana 5 stav 1 tač. 1 i 2 ovog pravilnika, kao i klauzule iz člana 6 stav 1 ovog pravilnika dat je u Prilogu 1.

Sadržaj isprave o jemstvu (Blue Card) dat je u Prilogu 2.

Član 8

Obrazac 1 i Prilozi 1 i 2 čine sastavni dio ovog pravilnika.

Član 9

Ovaj pravilnik stupa na snagu osmog dana od dana objavljivanja u „Službenom listu Crne Gore“.

Broj: 02/1-345/26-1051/1

Podgorica, 18. maja 2026. godine

Ministar,
Filip Radulović, s.r.

**SERTFIKAT O OSIGURANJU ILI DRUGOM FINANSIJSKOM JEMSTVU U POGLEDU ODGOVORNOSTI ZA SMRT
I TJELESNU POVREDU PUTNIKA (BRODOVI KLASA A I B)**

Ime broda	Broj ili slova raspoznavanja	IMO identifikacijski broj broda	Luka upisa	Ime i puna adresa glavnog mjesta poslovanja prevoznika koji stvarno obavlja prevoz

Ovim se potvrđuje da navedeni brod ima valjanu polisu osiguranja ili drugo finansijsko jemstvo u skladu sa zahtjevima odredaba člana 4bis Atinske konvencije o prevozu putnika i njihovog prtljaga morem iz 2002.

Vrsta osiguranja

Trajanje osiguranja

Naziv i adresa osiguravača i/ili jemca (jemaca)

Naziv

Adresa

Ovim se potvrđuje da je osiguravajuće pokriće podijeljeno na dio osiguranja ratnih rizika i dio osiguranja ostalih rizika osim ratnih, u skladu sa sprovedenim smjernicama koje je u oktobru 2006. usvojio Pravni odbor Međunarodne pomorske organizacije. Svaki od ovih djelova osiguravajućeg pokrića podliježe svim izuzećima i ograničenjima dopuštenim Konvencijom i sprovedenim smjernicama. Osiguravači nijesu solidarno odgovorni. Osiguravači su:

Za ratne rizike: _____ (adresa)

Za ostale rizike osim ratnih: _____ (adresa)

Ova potvrda važi do

Izdala Lučka kapetanija (navesti naziv)

Republika Crna Gora

U dana

(Mjesto)

(Datum)

.....
(Potpis i funkcija službenika koji izdaje ili ovjerava potvrdu)

**SERTIFIKAT O OSIGURANJU ILI DRUGOM FINANSIJSKOM JEMSTVU U POGLEDU ODGOVORNOSTI ZA SMRT
I TJELESNU POVREDU PUTNIKA (BRODOVI KLASSE C I D)**

Ime broda	Broj ili slova raspoznavanja	IMO identifikacijski broj broda	Luka upisa	Ime i puna adresa glavnog mjesta poslovanja prevoznika koji stvarno obavlja prevoz

Ovim se potvrđuje da navedeni brod ima valjanu polisu osiguranja ili drugo finansijsko jemstvo u skladu sa zahtjevima odredaba člana 4bis Atinske konvencije o prevozu putnika i njihovog prtljaga morem iz 2002.

Vrsta osiguranja

Trajanje osiguranja

Naziv i adresa osiguravača i/ili jemca (jemaca)

Naziv

Adresa

Ova potvrda važi do

Dopuštena ograničenja, uslovi i izuzeća osiguravajućeg pokrivača:

.....

Izdala ili ovjerila Lučka kapetanija (navesti naziv)

Republika Crna Gora

U dana

(Mjesto)

(Datum)

.....
(Potpis i funkcija službenika koji izdaje ili ovjerava potvrdu)

INSTITUTSKA KLAUZULA O ISKLJUČENJU POKRIĆA ZA RADIOAKTIVNO ZAGAĐENJE, HEMIJSKO, BIOLOŠKO, BIOHEMIJSKO I ELEKTROMAGNETSKO ORUŽJE (CL 370, 10/11/2003)

Ova klauzula je uvijek primjenjiva i prevladava nad svim drugim elementima ovog osiguranja koji nijesu u skladu sa njom 1. Ovo osiguranje ni u kom slučaju ne pokriva gubitak, štetu, odgovornost ili troškove koji su direktno ili indirektno uzrokovani ili su potpomognuti ili su nastali zbog:

- a) jonizirajućeg djelovanja radioaktivnog zračenja ili radioaktivnog zagađenja od bilo kojeg nuklearnog goriva ili od nuklearnog otpada ili od izgaranja nuklearnog goriva;
- b) radioaktivnih, otrovnih, eksplozivnih ili drugih opasnih ili radioaktivnih svojstava bilo kojeg nuklearnog postrojenja, reaktora ili druge nuklearne naprave ili njihovih nuklearnih sastavnih djelova;
- c) bilo kojeg oružja ili naprave sa atomskom ili nuklearnom fisijom i/ili fuzijom ili drugom sličnom reakcijom ili radioaktivnom snagom ili materijom;
- d) radioaktivnih, otrovnih, eksplozivnih ili drugih opasnih ili radioaktivnih svojstava bilo koje radioaktivne materije. Izuzeće u ovoj potklauzuli ne primjenjuje se na radioaktivne izotope različite od nuklearnog goriva kada se ti izotopi pripremaju, prevoze, skladište ili upotrebljavaju u komercijalne, poljoprivredne, zdravstvene, naučne ili druge slične miroљjubive svrhe;
- e) bilo kojeg hemijskog, biološkog, biohemijskog ili elektromagnetskog oružja.

INSTITUTSKA KLAUZULA O ISKLJUČENJU POKRIĆA ZA KIBERNETIČKI NAPAD (CL 380, 10/11/03)

1. U skladu sa klauzulom 10.2. navedenom u nastavku, ovo osiguranje ni u kom slučaju ne pokriva gubitak, štetu, odgovornost ili troškove koji su direktno ili indirektno uzrokovani ili su potpomognuti ili su nastali zbog upotrebe ili rukovanja, radi nanošenja štete, bilo kojim računarnom, računarskim sistemom, računarskim programom, zlonamjernom šifrom, računarskim virusom ili postupkom ili bilo kojim drugim elektronskim sistemom.

2. Kada je ova klauzula navedena na polisama koje pokrivaju rizike rata, građanskog rata, revolucije, pobune, ustanka ili građanskih sukoba proizašlih iz tih događaja, ili svakog neprijateljskog djelovanja od strane neprijateljske sile ili protiv nje, ili terorizma ili bilo koje osobe koja djeluje zbog političkih motiva, klauzula 10.1. ne dopušta isključivanje gubitaka (koji bi inače bili pokriveni) nastalih zbog upotrebe bilo kojeg računara, računarskog sistema ili računarskog programa ili bilo kojeg drugog elektronskog sistema u sistemu za lansiranje i/ili navođenje i/ili mehanizmu za ispaljivanje bilo kojeg oružja ili projektila.

KLAUZULA O AUTOMATSKOM PRESTANKU OSIGURAVAJUĆEG POKRIĆA I IZUZEĆU U SLUČAJU RATA

1. Automatski prestanak pokrića

Bez obzira na to je li izdato obavještenje o otkazivanju, pokrće AUTOMATSKI PRESTAJE DA VAŽI:

a) po izbivanju rata (nezavisno od toga postoji li objava rata) između bilo koje od ovih država: Velika Britanija, Sjedinjene Američke Države, Francuska, Ruska Federacija, Narodna Republika Kina;

2. za svaki brod za koji je odobreno pokrće, ako je za taj brod pokrenut formalni postupak oduzimanja broda zbog sticanja vlasništva ili posjeda na brodu.

2. Rat između pet sila

Ovo osiguranje isključuje:

a) gubitak, štetu, odgovornost ili troškove koji su nastali zbog izbivanja rata (nezavisno od toga postoji li objava rata) između bilo koje od ovih država: Velika Britanija, Sjedinjene Američke Države, Francuska, Ruska Federacija, Narodna Republika Kina;

b) oduzimanje broda zbog sticanja vlasništva ili posjeda na brodu.

SADRŽAJ ISPRAVE O JEMSTVU (BLUE CARD) ZA POKRIĆE RIZIKA

Isprava o jemstvu (Blue Card) treba da sadrži:

1) „Blue Card“ osiguravača ratnih rizika

Potvrda kojom se dokazuje pokriće osiguranja u skladu sa članom 4.a Atinske konvencije o prevozu putnika i njihovog prtljaga morem iz 2002.

Ime broda:

IMO identifikacijski broj broda:

Luka upisa:

Ime i adresa vlasnika:

Ovim se potvrđuje da navedeni brod, dok je u vlasništvu navedenog vlasnika, ima valjanu polisu osiguranja u skladu sa zahtjevima člana 4.a Atinske konvencije iz 2002. o prevozu putnika i njihovog prtljaga morem, na koje se primjenjuju sva izuzeća i ograničenja predviđena obaveznim osiguranjem za ratne rizike u skladu sa Konvencijom i s provedenim smjernicama koje je usvojio Pravni odbor Međunarodne pomorske organizacije u oktobru 2006., uključujući posebno sljedeće klauzule:

[ovdje, zavisno od želje ugovornih strana, mogu biti umetnute odredbe Atinske konvencije o prevozu putnika i njihovog prtljaga morem iz 2002 i I M O Smjernica sa dodacima]

Period osiguranja od: (datum početka osiguravajućeg pokrića)

do: (datum isteka osiguravajućeg pokrića)

Pod uslovom da osiguravač može poništiti ovu potvrdu tako da navedenom tijelu pošalje pisano obavještenje o otkazivanju 30 dana unaprijed, čime odgovornost osiguravača prestaje od dana isteka navedenog otkaznog roka, ali samo u pogledu nezgoda koje su se dogodile nakon toga.

Datum:

Potvrdu izdaje:

(naziv osiguravača)

[Adresa]

(kao zastupnik...)

.....
Potpis osiguravača

2) „Blue Card“ osiguravača ostalih rizika osim ratnih

Potvrda kojom se dokazuje osiguranje u skladu sa članom 4.a Atinske konvencije o prevozu putnika i njihovog prtljaga morem, 2002.

Ime broda:

IMO identifikacijski broj broda:

Luka upisa:

Ime i adresa vlasnika:

Ovim se potvrđuje da navedeni brod, dok je u vlasništvu navedenog vlasnika, ima valjanu polisu osiguranja u skladu sa zahtjevima člana 4.a Atinske konvencije iz 2002. o prevozu putnika i njihovog prtljaga morem, na koje se primjenjuju sva izuzeća i ograničenja predviđena za osiguravače koji ne pokrivaju ratne rizike u skladu sa Konvencijom i sprovedenim smjernicama koje je donio Pravni odbor Međunarodne pomorske organizacije u oktobru 2006., uključujući posebno sljedeće klauzule:

[ovdje, zavisno od želje ugovornih strana, mogu biti umetnute odredbe Atinske konvencije o prevozu putnika i njihovog prtljaga morem iz 2002, i I M O Smjernica sa dodacima]

Period osiguranja od: (datum početka osiguravajućeg pokrića)

do: (datum isteka osiguravajućeg pokrića)

Osiguravač može poništiti ovu potvrdu tako da navedenom tijelu pošalje pisano obavještenje o otkazivanju tri mjeseca unaprijed, čime odgovornost osiguravača prestaje od dana isteka navedenog otkaznog roka, ali samo u pogledu nezgoda koje su se dogodile nakon toga.

Datum:

Potvrdu izdaje: (naziv osiguravača)

[Adresa]

.....
Potpis osiguravača

Kao zastupnik za (naziv osiguravača).....